

Vun driweriwer

erscheint auf www.lenauheim.de

monatliche
Erscheinung

Oktober 2016

von Helen Alba

„Die alte Mensche gheere zu uns“!

25. Jubiläum im Bakowaer Altenheim

Unerm Motto „In der Welt e Heim, im Heim e Welt“ hat die Adam-Müller-Guttenbrunn-Stiftung un es Hilfswerk der Banater Schwowe Mitte September 2016 zahlreichi Gäscht uf Bakowa ingelad. Es dortichi Altenheim hat sei 25-jähriches Bestehe gfeiert. Es war e gelungeni „Geburtstachsfeier“, die nit nor die Herze der Altenheimbewohner heher hat schlaan losse. Alli Anwesende war stark beeindruckt un han sich mit de Seniore, die im Heim e scheene un zufriedene Lewesowet verbringe, gfreit.

Vor der Bakowaer römisch-katholisch Kerch hat korz vor elf Uhr die Blechmusich angeschlaa. Matz Henschl un sei Rekascher Musikante han als Willkommensgruß e Marsch in die Luft gschmettert. Mitglieder vum Jugendtrachteverein „Banater Rosmarein“ aus Temeschwar han in der Kerweitracht Spalier gstann, wie unser Bischof Martin Roos mit eener Priesterschar ausm Pharrhaus in die Kerch gschritt is. Es war e andächtiche un ergreifender Gottedienscht, der alli Anwesende zu Herze gang is. Die Predich vun unsrem Bischof hat alli, am meischte awer uns Schwowe, zruckdenke gelosst. „Die alte Mensche gheere zu uns“, so hat unser Bischof betont.

In unsre Schwowederfer hat mer frieher immer gewisst: Unser Eltre, Großeltre un oft ach Urgroßeltre han uns großgezoo un zu rechtschaffene Mensche gemacht. Unser Pflicht war, sie im Alter zu hege un zu pflege. Wann mer so zruckdenkt, der Begriff Altenheim war uns nitamol geleifich. Un es sin Zeite kumm, do hat mer umdenke misse. Villi Seniore sin leenich zruck geblieb. Mer hat Hilf schaffe misse. Un so is es erschi deitschi Altenheim in Bakowa ingericht wore. Aller Dankbarkeit geht an die Initiatore, Helfer, Spender, Betreier un Heimleitung. Es is vill Liebe un seelisch Kraft notwendig, um de alte Mensche ihre Lewesowet so scheen wie meeglich zu gestalte.

De Bischofssegen

Noh der Mess sin alli uner Marschbegleitung ins Altenheim gang. Bischof Martin Roos hat die Heimbewohner un alli Reimlichkeite gsegnet. Als erschi hat sich dorte Barbara Stamm, Präsidentin vum Bayerische Landtag, zu de Altenheimbewohner gsitzt un hat mit ihne verzählt. Barbara Stamm hat vor meh als 20 Jahr als erschi Politikerin aus Deitschland es erschi deitschi Altenheim in ganz Südosteuropa, es Altenheim in Bakowa, betret. Schun selmols hat sie gewisst, dass Europa wachse muss. Derezeit is Barbara Stamm oft ins Banat kumm, ihre 50. Besuch hat se schun längscht iwerschritt. Sie hat immer gholf, wus notwendig war. Un ihre warmes Herz hat se immer wieder ins Banat un uf Bakowa gfiehr. Im Altenheim-Hof hat die Musich sogar zum Tanz ufgspillt, mer hat Zeit ghat, sich mitnaner zu unerhalle un es Heim zu besichtige.

Es Jubiläumsfescht is im Bakowaer Kulturheim weitergang, dorte han sowohl die Heimleitung als ach zahlreichi Gäscht es Wort ergriff. Die Rosmareiner han getanzt, die Musich hat ufgspillt.

Es Bakowaer Altenheim is im September 1991 seiner Bestimmung iwegin wore. Dass alles wie am Schnierche laaft, drum kimmre sich Helmut Weinschrott, Vorsitzender der AMG-Stiftung, un sei Frau Anna Weinschrott. Dort were 17 Persone ausm ganze Banat betreit. Zusätzlich gin ungefähr 40 Dorfbewohner mit „Essen auf Rädern“ versorcht. 35 Schulkinner krien täglich es Mittachesse im Speisesaal. Un des dank der Unerstizung der Arweitsgemeinschaft „Berchtesgaden hilft Rumänien e.V.“.

Em Alter die Ehr

Phaar Täch noh dere Jubiläumsfeier sin ich nochmol uf Bakowa gfahr, weil ich mich bissl umschaue un verzähle han wille. Begriesst vun Vasile Vidov, em Koch, un Irina Buftea, Betreierin, han ich ohne vill zu frooe gewisst: de alte Leit do geht's gut, sie sin in beschte Händ. Sie were gut gepflegt, krien täglich drei Hauptmahlzeite un nohmittachs noch e Jausenbrot. Villi schwowischi Gerichte gin uf de Tisch gstellt, es werd mit gutem Appetit zugelangt. Täglich kummt e Krankenschwester vorbei un ach e Hausarzt is for die Altenheimbewohner zuständig.

Mit Vasile Vidov han ich schwowisch plausche kenne: „Täglich were 75 Porzione zu Mittach gekocht. Weil jo Esse ausgfiehr't git un die Schulkiner reihum (dennoh wievill Schulstunde se han) doher esse kumme. Dreimol in der Wuch git Kuche gebackt, an de anre Täch gits Obst zum Nachtsch. For unser Altenheimbewohner koche mer meischt ach owets, manchmol gits ach zum Fruhstuck Aijerspeis, Reis-oder Griesbrei“, so de Koch.

Ich betret e Zimmer un Anna Boiciuc lächelt freindlich. Newer ihr is die Banater Zeitung ufgschlaa. De Fernseh is ingschalt un de Andy Borg singt grad e scheenes Lied. Die Bäsl Anna is 89 Jahr alt un lebt seit fünf Jahr im Bakowaer Altenheim. Sie fangt zu verzähle an: „Aus Temeschwar sin ich doher uf Bakowa kumm. Ich han vill dorchmache misse in meim Lewe. Wie ich fünf Jahr alt war is mei Vater un zwaa Jahr druf die Mutter gstorb. Ich han uf mei drei Brieder owacht gin misse. Dann sin ich als blutjunges Mäd'l uf Russland verschleppt gin. Wie ich von dorte hemkumm sin, hat mich e gewissi Familie Baumann adoptiert. Ich han Schneiderin gelernt, der Beruf hat mer vill Spass gemacht. Elf Jahr lang han ich in der `Bega`-Schneiderei gearweit. Dann is mei Adoptivmutter schwer krank gin un ich han se bedient un gepflegt. Später han ich dann privat, also vun derhem aus genäht. Was ich ach jetz noch do im Altenheim mache tun: ausbessre, Scherzer oder Bettsach nähe“.

De Sohn der Bäsl Anna is schun mit 47 Jahr gstorb. Ihre Tochter, Enkelin un zwaa Urenkle lewe in Italien. Hie un do kumme se die Oma bsuche. Mit Träne in de Aue saat die Bäsl Anna: „Es geht uns gut do, mir sin mit allem versorcht. Manchmol kann ich gar nit alles esse. Dann heb ich de Rescht uf un ess in zwaa Stund nochmol im Zimmer. Weil ich vun Kind an gewehnt sin: nix im Teller losse“!